



Broj: 01-50-1-54-68/05
Sarajevo, 14. oktobra 2005.

ZAPISNIK

68. sjednice Predstavničkog doma
Parlamentarne skupštine Bosne i Hercegovine,
održane 14. oktobra 2005. godine

Sjednica je počela u 10,05 sati. Prisustvovalo je 36 poslanika.

Opravdano su odsustvovali: Fatima Leho, Mehmed Suljkanović, Ljiljana Milićević, Nenad Mišić, Dušanka Majkić i Muhamed Moranjkić.

Iz Vijeća ministara BiH prisustvovao je ministar Bariša Čolak, a iz međunarodnih organizacija sjednicu su pratili Jelena Despot i Sanja Stanojević – OHR, Kristijan Haupt – OSCE i Mirsad Žiga – američka ambasada.

Predsjedavajući Nikola Špirić obrazložio je okolnosti za hitno sazivanje ove sjednice i rekao da se predlaže samo jedna tačka dnevnog reda, a to je **Odluka o prihvatanju Sporazuma o restrukturiranju policijskih struktura u BiH.**

Zlatko Lagumdžija zatražio je da mu se odgovori kada će se na dnevni red staviti Prijedlog zakona o izmjenama i dopunama Zakona o PDV-u i Prijedlog zakona o izmjenama i dopunama Zakona o akcizama, čiji su predlagači poslanici SDP-a. Napomenuo je da je na prošloj sjednici usvojen zaključak po kojem je ove zakonske prijedloge trebalo razmatrati najkasnije do 15. oktobra.

Predsjedavajući Špirić odgovorio je da je ova sjednica sazvana po posebnom postupku i zbog novonastalih okolnosti, pa je zamolio da se ne traži proširenje dnevnog reda. Što se tiče pomenutih zakona, predsjedavajući je rekao da je nadležna komisija završila razmatranje i da će već danas stići izvještaji o ovim zakonima, kao i da će naredna sjednica Doma biti održana 25. oktobra, na kojoj će se razmatrati ovi zakonski prijedlozi.

Zlatko Lagumdžija zatražio je da se ovi zakoni razmatraju prije 25. oktobra i predložio da Kolegij o tome donese radni zaključak. Naglasio je da su ovi zakoni dovoljan razlog da se sazove i vanredna sjednica.

Nijaz Duraković podržao je prijedlog Zlatka Lagumdžije i predložio da se sjednica sazove za narednu srijedu.

Predsjedavajući Špirić upozorio je da Kolegij Doma po Poslovniku saziva sjednice. Zamolio je Lagumdžiju da ima strpljenja i razumijevanja, kako bi sjednica bila kvalitetno pripremljena.

Nije bilo prijedloga za dopunu dnevnog reda, pa je predsjedavajući konstatirao da 68. sjednica ima sljedeći

DNEVNI RED

1. Odluka o prihvatanju Sporazuma o restrukturiranju policijskih struktura u Bosni i Hercegovini

Ad – 1:

Predsjedavajući Doma Nikola Špirić je u uvodnim napomenama, uz ostalo, rekao da je Narodna skupština RS-a, na sjednici održanoj 5. oktobra 2005., prihvatila Sporazum o restrukturiranju policijskih struktura u BiH, o čemu je i OHR 6. oktobra obavijestio Parlament. Uz Sporazum, OHR je Parlamentu dostavio i pismo Fabricija Barbarose, kojim je potvrđeno da Sporazum ispunjava tri osnovna principa Evropske unije. Rekao je da su Sporazum prihvatili i Vijeće ministara BiH i Parlament Federacije BiH.

Vinko Zorić je, u ime Kluba HDZ-Demokršćani, predložio da Dom, uz Sporazum, usvoji zaključke u dvije tačke, i to:

1. Predstavnički dom Parlamentarne skupštine BiH insistira da kantonalni MUP-ovi i federalni MUP u daljnjem toku reforme policije dijele sudbinu s MUP-om Republike Srpske u vezi sa statusom i nadležnostima i

2. Predstavnički dom zahtijeva od Vijeća ministara BiH da ovaj dom redovno informira o toku reforme policijskih struktura.

U raspravi su učestvovali: Beriz Belkić, Momčilo Novaković, Mladen Potočnik, Selim Bešliagić, Martin Raguž, Jozo Križanović, Milorad Živković, Mirsad Ćeman, Sead Avdić, Mirko Blagojević, Miloš Jovanović, Zlatko Lagumdžija, Vinko Zorić, Seada Palavrić i Ivo Lozančić.

Zlatko Lagumdžija je u raspravi predložio da se usvoji sljedeći zaključak:

Predstavnički dom obavezuje Vijeće ministara BiH da ovaj dom informira o toku reforme policijskih snaga svaka tri mjeseca, s akcionim planom implementacije u narednom kvartalu.

Nakon rasprave, predsjedavajući je prvo na glasanje dao Prijedlog odluke o prihvatanju Sporazuma.

Za Odluku je glasao 31 poslanik, protiv dva, suzdržao se jedan – po entitetima – iz FBiH za su glasala 23, iz RS-a osam poslanika.

Predsjedavajući je konstatirao da je usvojena Odluka o prihvatanju Sporazuma o restrukturiranju policijskih struktura u Bosni i Hercegovini.

Dalje je predsjedavajući na glasanje dao prijedlog zaključka Vinka Zorića pod brojem 1.

Za je glasalo 14, protiv 11, suzdržalo se devet poslanika. Iz Federacije BiH za je glasalo 14, iz RS-a nije bilo glasova za.

Predsjedavajući je konstatirao da prvi zaključak Vinka Zorića nije dobio entitetsku većinu i da će se naknadno provesti postupak usaglašavanja.

Vinko Zorić obavijestio je Dom da prihvata da drugi zaključak glasi onako kako je predložio Zlatko Lagumdžija.

Zatim je predsjedavajući proveo glasanje o zaključku Vinka Zorića pod br. 2., dopunjenom prijedlogom zaključka Zlatka Lagumdžije.

Za ovaj zaključak glasalo je 18, protiv sedam, suzdržalo se šest poslanika. Iz Federacije BiH za je glasalo 17, iz RS-a jedan poslanik. Prema tome, ni ovaj prijedlog zaključka nije dobio entitetsku većinu, pa će se provesti postupak usaglašavanja u Komisiji Kolegija.

Predsjedavajući Nikola Špirić zahvalio je svima na konstruktivnom doprinosu kako bi se u Domu postigao konsenzus za prihvatanje Sporazuma o restrukturiranju policijskih struktura u Bosni i Hercegovini.

Ovim je, u 11,15 sati, završena 68. sjednica Predstavničkog doma.

Sastavni dio Zapisnika je transkript 68. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVALAČI
PREDSTAVNIČKOG DOMA
dr. Nikola Špirić